

Opusc. PA-I-1393-

R. PANEBIANCO

Adoptione de lingua internationale
es signo que evanesce contentione
de classe et bello.



48119/1393

83560

PADOVA
STAB. GRAFICO L. BOSCARDIN
1921



Adoptione de lingua internationale es signo
que evanesce contentione de classe et bello.

Es adoptione de lingua internationale que fac evanesce contentione de classe et bello aut es evanescencia de isto duo scelerato re que fac adopta lingua internationale?

Isto es ipso quæstione si exsiste ante ovo aut gallina!

Certo que quando statu de productione adveni ad opportuno evolutione (et me non sci si isto statu es illo actuale) contentione de classe more per simplice facto que evanesce isto duo classe, uno formato de paucio opulento et alio de numeroso paupere. Isto suo morte es debito ad extenuatione lento de illo cumulo de usus que constitue institutione magis antiquo et magis importante de proprietate privato de medios de productione (agros, minas, fabricas et machinas agricole et industriale etc.) et de commutatione (ferrovias, naves, automobiles etc.). Ultimo phasi de morte de isto institutione et, ergo, de contentione de classe, es violento. Historia doce es violentia obstetrica de vetere systema sociale que sta pro parturi uno novo. Desiderio de humano civilitate que non vol violentia nihil pote! Violentia per que pullo rumpe involucro de ovo es inevitabile!

Grande revolutione initiato in epocha præhistorico fac substitue, in modo graduale, usque ad tempore historico, proprietate privato ad colectivo. Isto antiquo proprietate non es plus capace de da ad homines necessario augmento de productione, ergo, surge actuale proprietate. Hodie productione es extreme exuberante, tanto que es dissipato immenso quantitate de humano labore. Res non

solo inutile sed pernicioso (milliones de fusile et de cannone, enormē naves revestito per lorica de aciaro, submarinos, aeroplanos etc.), humano scelerato dementia produc! Si productione de res inutile et de pernicioso fi abolito, labore humano fi reducto ad 4 aut 5 hora per die. Ergo, non essendo plus forma actuale de productione (illo que basa se super proprietate privato) necessario, essendo superabundantia de productione, isto forma, causa de scelerato injustitia, evanesce, et proprietate colectivo es restituto ad mundo. Nihil novo sub sole!

Homines de systema sociale basato super proprietate colectivo es socio, ergo, non existe plus illo duo classe antagonista ante dicto. Toto homines fi, in tale systema, commodo laborante de labore directivo aut subordinato et nullo homine pote vive sine labora, id es ut parasito super labore de proletarios. Tunc lingua internationale fi reale internationale, et tunc, cum evanescentia de contentione de classe, necessario producto de proprietate privato, es probabilitate grande que evanesce bello. Adoptione de lingua internationale et evanescentia de contentione de classe non es subitaneo. Illos es: adoptato primo, et es facto evanesce ultimo in modo plus aut minus rapido aut lento, usque ad morte ante dicto de contentione de classe.

Usque tanto que existe contentione de classe, lingua internationale *forsan* non fi reale internationale. Sed isto existentia de scelerato contentione de classe et isto *forsan* non possibile internationalitate de nostro interlingua (Int.), non pote impedi, ad præcursores de illo nobile idea pro adoptione de lingua internationale, de labora pro suo actuatione. Isto præcursores, que consuma suo sudato et parcito moneta pro fac re magis utile ad suo simile, es, in primo tempore, deriso ab vulgo burgense. Isto vulgo forma magis grande parte de burgesia, uno de duo classe antagenista et que demente vol plus cito perde vita que suo privilegio de dominio super alio classe, illo de proletario, i. e. de laborante. Laborantes, in primo tempore, non es capace de comprehendere que conato pro adoptione de lingua internationale es signo que suo catena de servitute sta pro rumpe se, et non da ad isto præcursores ullo animo. Sed isto præcursores, inter derisione de primo et indifferentia de secundo, continua imperturbato sua opera pro bono de suo simile! Uno de isto præcursores, ab multo annos strenuo propugnatore

pro triumpho de isto nobile idea, es nostro amato socio, reverendo J. B. Pinth de Luxemburg, auctore de plure publicatione in Int., et speciale de vocabulario deutsch - Int. Ad illo me mitte affectuoso sentimento de maximo æstimatione.

Sed existe contentione de classe? Quasi toto diurnales, et certo illo magis diffuso, scribe, et numeroso homine politico de classe burgense scribe et loque de actuale harmonias sociale! Etiam cultores de scientia œconomico, que fac crede es scientista, dum illos es sycophanta de capitale, dic que systema sociale actuale basa se super harmonias sociale, super collaboratione amicabile de laborantes cum domino! Numeroso burgense pauco instructo, dic que isto contentione de classe es inventione de socialistas, dum isto contentione es de maximo antiquitate. Illo incipe quando incipe proprietate privato, que divide homines (que ante, quando existe Gentes in vice de nationes, es socio) in duo classe antagonista: uno formato de pauco domino et alio de numeroso servo.

In tempore de Platone, 4 seculo ante Christo, isto grande philosopho scribe: «Omni civitate, et si inter illos plus parvo, non es uno civitate sed duo: uno de opulentos et alio de pauperes, uno contra alio pugnante».

Quatuor seculo retro, Thomaso Moro [grande cancellario de anglo regno, sub rege: Defensore de Fide (titolo dato de papas ad Enrico VIII ante suo abjuratione de catholica fide), que dilige se decapitando suo uxores et cancellarios] scribe: «Opulentos vol posside medios que, ultra assecura ad se suo opulentia in modo malo acquisito, es etiam apto ad fac volve ad suo exclusivo profectu, solvendo in maximo minore modo, labore de pauperes. Et quando illos inveni isto medios, in nomine de patria, isto medios es imposito per lege». Isto auctore immortale de Utopia adjunge, pro claritate, «es vita de bestias invidiabile pro isto pauperes».

Per isto suo scripto illo es bene meritante suo decapitatione!

Sed nos redi ad lingua internationale. Es evidente que essendo id sine grammatica, id es de maximo facilitate et simplicitate. Ergo, es per illo quasi impossibile ad fac ambiguitate, excepto ad præposito. Etiam es multo plus rapido compone et scribe in isto lingua que in proprio lingua nationale. Effective, dum in lingua nationale, vocabolo que exprime actione (i. e. verbo de grammatica) habe grande numero de variatione et etiam de mutatione de radice

(A. *be, is, was*, etc.; F. *être, suis*, etc.; I. *essere, sono, fui*, etc.), in lingua internationale isto vocabulo, ut *omni alio suo vocabulo, es invariabile*. Vocabulo *es* de Int. habe in français 56 forma diverso et circa ipso in italiano!

Illo que aperi libro de uno lingua nationale, si non cognosce isto lingua, non es capace, etiam si illo posside vocabulario et grammatica de isto lingua, de intellige id. In contrario, scripto in Int. es intellecto perfecte ab persona que vide primo vice isto Int., si illo posside vocabulario de Int., aut, post ullo minuto de opportuno instructione de latino, vocabulario de latino de schola. Effective isto facto de intellige lingua per solo vocabulario es possibile quare Int. habe, ut es ante dicto, suo vocabulos invariabile. Solo exceptione es adjuccione de *s* ad vocabulo que designa persona aut re que es plure, si per comitante vocabulo non es intellecto que es plure. Ergo, persona scribe: « duo libro, serie de libro » et non « duo libros, serie de libros ».

Selectione de latino, ut basi de Int., es facto, nam suspicione nationale, abjecto producto de systema sociale in que homines non es socio sed diviso in duo classe et plure natione, non permette ute lingua nationale ut Int. Certo *english* es lingua nationale de grande diffusionem et suo grammatica es plus simplice que in omni alio lingua, sed suo pronuntiatione es magis difficile pro suo irrationalitate; cetera, non es possibile, pro illo que es ante dicto, suo adoptione ut Int.

Pro intellige uno lingua nationale necesse plure mense de studio et pro scribe correcte id plure anno. Pro scribe correcte italiano nos stude id 11 aut 12 anno! Correcte? Sæpe me senti professore de lingua italiano dic de suo collegas que illo scribe ut cane! In conclusionem omni lingua nationale es multo difficile.

Capitalista et suo intellectuale clientes habe possibilitate ad stude longo tempore et ad disce suo lingua nationale. Laborante que es proletario non habe isto possibilitate.

Et isto grande, magis grande privilegio de capitalistas et suo clientes intellectuale, pone laborantes ad fronte ad suo inimico in grande inferioritate et, ergo, solida suo catena de servitute.

Clientes intellectuale, que es fortia ultra potente de capitalistas, specie illos que, ut in isto casu, es plus idoneo, i. e. literatos, pugna in forte modo contra adoptione de isto lingua. Isto

adoptione fac perde ad capitalistas uno de suo maximo privilegio, et suo clientes defende illos contra isto jactura pro recipe, in compensatione de suo turpe actione, parte de manubiæ que capitalistas præda ad laborantes.

Me ute vocabulos urente: turpe, manubiæ et præda. Sed illo es proprio. Sed capitalistas que præda manubiæ et suo intellectuale cliente que fac actione turpe de defende illo, non es responsabile, isto de suo turpe actione et illo de præda manubiæ. Responsabile es solo systema sociale. Proletario que, per casu raro fi capitalista, fac illo que fac isto: i. e. præda manubiæ ad suo antiquo comites, et si illo fi intellectuale cliente de capitalista, illo, in generale, fac turpe actione de defende prædatore de suo antiquo comites: illo fi sycophanta de capitale.

Responsabile de omni malo que homine fac, in generale, contro alio homine es systema sociale magis scelerato, que da ad homines possibilitate de acquire opulentia. Isto acquisitione da ad illos exuberante gaudio egostico, dum opulentia de uno produc necesse paupertate de multos. Paupertate non solo da ad homine exuberante dolore, sed produc degeneratione de specie humano. Effective vita medio de proletarios es dimidio de illo de opulento aut commodo homines. Seque que opulento, per solo facto de es opulento, es carnefice, sine suo voluntate, de proletarios, que es suo simile. Si tale systema sociale homicida es defenso ab ullo homines, ad isto es bene applicato verbo de Christo: « Domino perdona ad illos nam illos non sci id que illos fac ».

Omni amante de suo simile debe ode, de magis intenso odio, isto scelerato systema sociale. Sed nullo vice debe homine ode alio homine et si illo es defensore de isto scelerato systema sociale, et si illo es delinquente. Homine de corde et intellecto debe ode delicto, sed perdona ad delinquente, que, 99 vice super 100, es necessario producto de systema sociale. Es sufficiente impedi ad delinquente de repete delicto! Homine de corde et intellecto debe fac toto que illo pote pro emenda delinquente. Punitione es turpe residuo de medioævale barbarie!

Homines, me ante dic et me repete, non es, in generale, responsabile de malos de systema sociale. Isto magis turpe et magis scelerato systema pone homine in bivio terribile, aut de labora relinquendo parte de fructu de suo labore ad alio suo simile, ad

parassita, ad domino, et ergo vivendo in paupertate, aut de fi domino. Alio via, isto infernale systema sociale, non relinque ad homine!

Interlinguista, quale que es suo opinione politico aut religioso (Academia pro interlinga demanda ad suo socios *solo* suo contributo annuale de 10 franco pro expensas de officio), es certo præcursore de novo systema sociale. Isto novo systema, in que homines loque uno solo lingua magis facile, commune ad illos (sine que illos fac innaturale re de demitte suo lingua nationale ut illos non fac innaturale re de demitte suo dialecto) non pote es actuale systema de « homo homini lupus », sed es systema sociale in que toto homines fi socio.

Interlingua *forsan* non fi internationale que quando actuale sclerato systema sociale es relicto, simul ad toto alio medioævale barbarie deturpante humanitate! Sed isto *forsan*, evidente non es certitudine, et es bene noto que voluntate humano, que non es causa de eventus sociale, es certo, de reflexo influentia, accelerante id. Intelinguista, que labora, cum grande entusiasmo, pro diffunde suo nobile idea, accelera isto eventum i. e. que Int. fi reale lingua internationale.

Optimo vocabulario de nostro bene merente præside Prof. Peano suffice, facendo per illo pauco hora de exercitio, pro scribe in correcto modo nostro Int. Post pauco die de isto exercitio, fi plus facile, ut me ante dic, de compone et scribe in Int. que in proprio lingua nationale.

Auxilio ad vocabulario de Peano es illos nationale - Int., ut illo ante indicato de Penth.

Vos, benevolo lectores, fac bono actione, dando ad nos animo per conjunctione de vestro fortia ad nostro, pro bene de humanitate. Omni uno de vos que fi socio de nostro Academia, centuplica nostro animo!

Intende, meo benevolo lectores! Ultimo bello occide 14 miliono de juvene sano et forte, que, in generale, non vol more nec fac more suo simile. Lingua internationale es potente medio pro conserva expulsionem de mundo de suo plus horribile et terribile malo: bello!